

Date – 01/01/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram sorkarin kumhlui thlah zana halpuah leh a behbawm hal a khap chu a hlawhtling lo.
2. Mizoram Pollution Control Board chuan Mizoram chu India ram pum huapa halpuah leh halmawi hal tlem ber state a nih ngei an beisei thu nimin khan an sawi.
3. President Droupadi Murmu-i chuan ram mipuite kum thar 2025 chibai a buk.
4. Nizan khan khawvel pumah kum hlui 2024 thlahliamin kum thar 2025 hmuah thlen a ni.



NEW YEAR FIREWORKS

Kum hlui thlaha Kum Thar lawmna tura sorkarin halpuah, halmawi leh a behbawm hal lo tura sorkar thupek leh tlawmngai pawlte'n zirtirna an pek chuan kuminah pawh zawm a hlawh lutuk lova, kumhlui thlah leh kum thar lawmna atan halpuah leh halmawi ang chi an hal nasa thawkhat hle.

Nizan kumhlui leh kum thar inthenna zanlai dar 12 thlen dawn tep atang khan halpuah, halmawi leh a behbawm an hal tan a. Kum danga dar 11 leh a chanve vel atanga hal tan ang kha ni lovin zanlai dar 12 rik dawn tepah hal tan a ni. Kan correspondent-te sawi daninin Aizawl veng hrang hrangah halpuah, hal mawi leh a behbawm hal hi kum hmasa lam chu pha chiah lovin lang mah se; an hal nasa thaw khat hle a. A puak ring chi thlengin an hal a ni. Sorkarin theihtawpa halpuah leh halmawi

hal lo tura thupek a siam leh tlawmngai pawlte'n an thlawpna chuan duhthusamin zawm a hlawh lo niin sawi a ni.

Hriat theih chinah halpuah leh halmawi hal avanga harsatna tawk an awm hriat a la ni lo.

(Desk)



HOME MINISTER

Home Minister Pu K. Sapdanga chuan kumhlui thlan zan leh zanlaia kumthar a lo thlen hunah Krismas anga halpuah leh halmawi hal lo chhonzawm zel turin nimin khan mipuite a ngen.

Nimina Akashvani palaiin a kawmnaah Pu K. Sapdanga chuan kumin 2024 Krismas chu muanawm takin hman a nih thu a sawi a. Halpuah leh halmawi khapna mipuiten an zawm that thu leh lawmawm a tih thu a sawi a. Kumtharah pawh sorkar thupek zawm chhonzawm zel turin mipuite a ngen a ni.

Home Minister chuan police leh YMA ten theihtawp chhuaha khawlai fanga halpuah leh halmawi chungchanga sorkar thupek miin an zawm thatna tura an beihna chu a tangkai thu a sawi a. Kohhran hrang hrangin Biak Inah te uar taka an puan thu leh naupang inkhawmna lam thlenga puanzar a nih thu a sawi a. Heng hmalakna hrang hrangte hi mipuiten an zawm avangin lawmawm a tih thu a sawi a ni.

Dan hmanga sorkarin a khap miao avangin dan kenkawh a ngai tih Home Minister chuan a sawi a, dan bawhchhia te chu dan anga kalpui a ngaih dawn avangin tuman dan bawhchhe lo hram se an duh takzet thu a sawi a. Mithenkhatin zalenna inhupbehsak anga an sawi chu an hriat sual palh liau liau a nih thu a sawi a. Tar chak lo te leh damlote zalenna tura hmalakna a nih zawk mah thu a sawi a. Sorkar hnathawk, sorkar dan kalh zawnga thu tichhuak thin an awm thu sawiin heng mite hi chhui zui zel an nih dawn thu leh sorkar mi te chu fimkhur lehzual tura a ngen thu a sawi a ni.

(Corr)



NEW YEAR

Kum hlui a ni tawp ber, nimin khan mipui tam tak kumhlui thlah tur leh kumthar lawm turin an inbuatsaih a, Aizawl bazarah

pawh sorkar ruahmanna-in Chanmari leh Zodin Square inkarah lirthei tlan titawpin No Vehicle Zone kalpui leh a ni.

Krismas leh Kum thar vuakveta Aizawl khawpui chhunga mipui bazar, ke a kalte him zawk na'na lirthei tlan lohna hmun No Vehicle Zone ruahman chu nimin kha a ni thumna niin Krismas hma ni hnih chhung kalpui a ni tawh bawk a. Mi tam tak kein bazarah an kal a, Krismas hmaa No Vehicle Zone nena khaikhinin mipui hi an tlem phah chuang lo tih Akashvani palaiin a sawi.

Nizan kha kum khata zan hnuhnung ber a nih avangin kohhran hrang hrangte chuan kumin chhunga an kohhran member kalta te pualin zan inkhawmah hun an buatsaih a. Kumin chhunga thite chanchinte chhiar chhuakin sunna hun bik siam a ni a. Kumin chhunga thi ta chhungte pawh biak-in chhungah thutna bik siamsakin urhsun takin hun an hmang leh dawn. Hei bakah hian kohhran tam tak chuan kumhlui thlaha kum thar lawm na'n a bik takin zanlai inkhawm an buatsaih bawk a ni.

Champhai District ah pawh mipuiten hlim leh ralmuang takin kumhlui an thlah a, District thuneituten ruahmanna chi hrang hrang an siam a. Nimin khan mipuite'n kumhlui thlahna leh kumthar lawmna turin bazar leh dawr hmunahte chakkhai an lam a, chhang zuar leh Sa lam chi zuarte'n dawrtu an ngahin Krismas urlawk ni aain kumhlui thlah ni ah ei leh in zuartute'n an inhralh tam zawk thu an sawi a ni. Champhai District-a police station hrang hrangah mipuite himna tur a duty dan tur leh pawikhawihute rang taka man chhuah an nih theihna turin ruahmanna siam a ni a, Champhai khawpui bikah chuan police ten duty post 7 siamin an inzarparh a ni.

Kumhlui thlaha Kumthar hmuakin Lawngtlai District mipuite boruak nuamtak hnuaiah an inbuatsaih a. Kumtina an lo tih thin angin Lawngtlai khawpuia thalaite chuan kawngpui dung leh hmun remchang laiah te kum 2024 thlah na'n ni tla tur an thlir liam leh a, he'ng hmun te hian buaina chhuak palh thei vengin Police leh Young Lai Association ten an vil reng bawk. He'ng Thalai pungkawmte hi Lawngtlai zaithiamten an awi reng bawk. Nizan khan Kohhran hrang hrangte chuan kumtawp inkhawm neiin, kumin chhunga an Kohhran mi chatuan ram pante sunna hun an hmang a, kumthar hmuakin zanlai inkhawm an buatsaih a ni. Sorkarin halpuah leh halmawi lam chi hal a khap chu khau takin Lawngtlai Police te chuan an kengkawh a, Central YLA pawn Branch YLA te chu sorkar tha tichak tura tan la turin a lo hriattir tawh bawk a ni.

Lungleiah pawh zan lam Kohhran programme-ah kumin chhunga member thite sunna hun hman a ni a. Chhungkua leh thianho a hun hman khawm an awm fur bawk.

(Corr/PTCs Champhai, Lawngtlai, Lunglei)



MPCB

Mizoram Pollution Control Board chuan Mizoram chu zanin kumhlui thlah zanah mipuite thuawihna avangin India ram pum huapa halpuah leh halmawi hal tlem ber state a nih ngei an beisei thu nimin khan an sawi.

Mizoram Pollution Control Board hotute'n Akashvani News Aizawl an hrilh danin Mizoram chhung, a bik takin Aizawlah kumin krismas urlawk zanah halpuah leh puak thei thil hal an awm mang lo an ti a, hei hi sorkar thuchhuak mipuite'n an zawm that vang liau liau a nih thu sawiin zanin kumthar lawmna leh kumhlui thlahna hunah pawh Mizoram chu krismas urlawk zan anga halpuah leh halmawi hal tlem berna state a nih ngei an beisei tlat thu an sawi.

Mizoram Pollution Control Board hotute chuan halpuah leh halmawi hal loh intih hmuh kawngah Zoram mipuite chuan hna ropui tak an thawk tih sawiin Police leh khawtlang hruaitute inpekna pawh a fakawm takzet thu an sawi bawk.

Mizoram Pollution Control Board hotute chuan Krismas lawmna ruai thehna atan Kohhran tamtakin hman khat daih plastic leh a tlukpuite hmang lovin tawih ral thei leh sil fai theih thleng leh no an hman chu fakawm an tih thu an sawi a, kumthar lawmna ruai buatsaih kawngah pawh Kohhran tinte hman khat daih plastic leh a tlukpuite hmang lova, sil fai theih emaw tawih ral thei thleng leh no hmang hram hram turin Mizoram mipuite an ngen tak meuh meuh thu an sawi bawk.

(John Vanlalchhuanga, Corr)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

(Desk)



NY GIFT

Nimin tlai khan Serchhip khawpuia Whatsapp Group pakhat ‘THUPUI SAWIHONA’ te chuan Serchhip Darnam Venga Hnuchham (An nu ten an boral san) unaute chu Group kaltlanga Vehbur an khawn sum tling khawm hmangin tanpuina an pe.

Pi Lalnunhlimi chu tunhnai khan Serchhip District Hospital-ah naute phir zai chhuah sak niin, that lam a pan theih loh avangin State Referral Hospital Falkawnah thawn a ni a. State referral hospital atang hian Aizawl Civil Hospital-ah thawn zui leh ni mahse vanduaithlak takin a nau neihna hi December ni 23 khan a thihpui ta a. Pa khat leh Pi Khawlsiampuii chu a fa 4 na tur hi state referral hospital Falkawnah zai chhuah sak niin, nau a neih fel hnuah Damdawi In chhuahsan thei mahse a zaina lamah fel lo a awm zui avangin vanduai thlak takin December ni 14 khan nausen leh a pasal fanau te chu a kalsan ve leh ta a ni.

An nute’n an thihsan hnuchham Serchhip Darnam Veng nausen 3-te hi pawisa fai Rs. 51,200 in tanpuina an pe a. Kum 2017 atang khan vawi 16 tanpuina leh khawtlang mamawh thil pe tawhin, vawiina an pek nen hian an pek chhuah chu cheng nuai 7 sing 3, sang 2 leh pahnih a ni.

(C. Lalhminghlua, PTC, Serchhip)



PRESIDENT DROUPADI MURMU GREETES NATION ON EVE OF NEW YEAR 2025

President Droupadi Murmu-i chuan ram mipuite kum thar 2025 chibai a buk.

President chuan kum thar hian beiseina thar, duhthusam thar leh tumna thar a keng tel thin a ti a. Kum lo thar leh thin hian hma lam pan turin, chakna thar nei tur leh duhthusam thlendiktir turin hun tha a rawn herchhuahpui a ni a ti.

President chuan mipuite chu kum thar hlim leh phur taka hmang turin a sawm a, ram leh khawtlang inpumkhatna tura tan la zel turin a chah bawk.

(NewsOnAIR)



NEW YEAR 2025 CELEBRATIONS

Nizan khan khawvel pumah kum hlui 2024 thlahliamin kum thar 2025 hmuah thlen a ni.

Kum thar lawmna atan hian mahni hnam ziarang leh chin dan bik hmang an awm nual a ni.

Pacific thliarkara Kiribati chu kum thar 2025 chuangkai hmasa ber ram an ni a, a ram mi 133,500-ten kum thar an lawm a. Micronesian chuan an dawt a, hemi zawh lawkah hian New Zealand-a Chatham thliarkar chuan kum thar a chuangkai leh a. New Zealand ami tho Auckland chu khawvela khawpui lian zinga kum thar 2025 chuangkai hmasa pawl zing ami a ni a. mipui sang telin Sky Tower-a halmawi an hal chu an chhim a ni.

Auckland dawtah hian Australia khawpui pakhat Sidney chuan kum thar a chuangkai leh a, kum thar hmuahna halpuah leh halmawi chu hmuhnawm tham a ni a, sana-in zanlai dar 12 a khawn khan mipui chuan kum thar chibai an inbuk sup sup a, lawng chawlhna chung zawnahte chuan eng mawi tak tihchhuah a ni.

Kum thar lawmna chuan Indonesia-a Bali vaukam atanga Singapore Marina Bay thlengin a suar tluan a, Dubai-a chuanteveuh hmun, Burj Khalifa te, London-a halhpuah thawm chu River Thames thlengin a thang khawk a, New York-a Times Square-ah chuan kum thar hmuakten hunbi an chhiar let a. Japan-ah pawh an hnam chin than danin kum thar ni chhuak hmasa ber hmuh tumin mi tam tak an tlaivar a ni.

(NewsOnAIR)

